

## Su l' vôle di Mwin.ni

Émile Hesbois

1. Il a djalè, su l' vôle di Mwin.ni  
Dj'a frèd mès pîds dins mès vîs solès  
I fait ridant su l' vôle di Mwin.ni  
Dji su fèrè come on vî baudèt  
I fait tot blanc, su l' vôle di Mwin.ni  
I m' faut rotè, po n' nin-z-èdjalè  
I-gn-a dès stwèles, su l' vôle di Mwin.ni  
Qui r'glatichèt, su tos lès bouchons

2. Su lès tîdjes dol vôle di Mwin.ni  
Li vint ûle, come on-assoti  
Su lès tîdjes dol vôle di Mwin.ni  
Gn-a l' nwâre bîje qui vos ranaîrit  
Su lès tîdjes dol vôle di Mwin.ni  
I m' faureut dol lin.ne di bèrbis  
Su lès tîdjes dol vôle di Mwin.ni  
Dol crausse lin.ne po r'tchaufè mès pîds

3. Dj'a r'passè su l' tîdje di Mwin.ni  
Quand lès mouchons tchantint o pachi  
Dj'a boutè l'uch : « È bondjoû, Marîye,  
Dji vos-apwate, on djon.ne di bèrbis »  
– « Â Bon Diè, m' fi, comint vos payi ?  
Dji n' so nin ritche, vos bacheroz vosse pris »  
– « Dji n' vos d'mande rin, qui d' tchôkè mès pîds,  
On p'tit momint pad'zo li d'vantrin ! »

4. Su lès tîdjes dol vôle di Mwin.ni  
I fait tchôd come au paradis  
Su lès tîdjes dol vôle di Mwin.ni  
Mès deûs pîds c'mincèt à frumejî  
Su lès tîdjes dol vôle di Mwin.ni  
Dji soketéye èt dji m' laî bèrci  
Su lès tîdjes dol vôle di Mwin.ni  
Gn-a deûs gngnos pus tchôds qu' dès bèrbis

5. Gn-a one maujon, su l' tîdje di Mwin.ni  
Èlle èst r'batûwe pa tos lès mwaîs vints  
Dj'a boutè l'uch : « È bondjoû, Marîye,  
Dji vôreu bin dol lin.ne di bèrbis »  
– « Â Bon Diè m' fi, dji n'a pupont d' bèrbis,  
Èlle a crèvé l' saison passéye !  
Maîs ci n'èst rin, si c'èst po vos pîds,  
Tchôkoz-lès vite pad'zo mi d'vantrin ! »

6. Su lès tîdjes dol vôle di Mwin.ni  
I fait tchôd, come au paradis  
Su lès tîdjes dol vôle di Mwin.ni  
Mès deûs pîds c'mincèt à frumejî  
Su lès tîdjes dol vôle di Mwin.ni  
Dji soketéye èt dji m' laî bèrci  
Su lès tîdjes dol vôle di Mwin.ni  
Gn-a deûs gngnos pus tchôds qu' dès bèrbis